

DISSERTATIO INAUGVRALIS MEDICA
DE
TVMORIBVS OEDEMATOSIS
EX
FEBRIBVS INTERMITTENTIBVS
ORIVNDIS

QVAM
PERMITTENTE
GRATIOSA FACVLTATE MEDICA,
PRÆSIDE
VIRO EXCELLENTISSIMO ATQVE EXPERIENTISSIMO
DOMINO
PHILIPPO FRIDERICO
GMELIN,

MED. DOCT. BOT. ET CHEM. PROF. PVBL. ORD.
SOCC. REG. SCIENT. LOND. ET GOETT. SODALI,

PATRONO AC PRÆCEPTORE SVO

ÆTERNVM PIE COLENDO

AD

CONSEQVENDOS SVMMOS IN MEDICINA HONORES

A. D. XIII. Octobr. A. MDCCLXII.

H. L. Q. C.

DEFENDET

A V C T O R

IOHANNES THEOPHILVS EBERHARDVS BOEHM,
Stutgardianus.

THE UNIVERSITY OF CHICAGO

LIBRARY

PHYSICS

1910

1911

1912

1913

1914

1915

1916

1917


1918

1919

1920



§1.

 De Tumoribus Oedematosis scripturus, nec Inflationem corporis quamcunque *a)*, nec solos pedum tumores phlegmaticos contemplabor *b)*: sed omne illud oedematis genus, quod Hippocrati molle audit, nec dolet, & pressum digitis cedit *c)*. Singularem ejus ante oculos habeo speciem in rubro dissertationis indicatam; quædam tamen ad notiones generales spectantia, & tractationem specialem collustratura dogmata præmittere non tædeat.

a) De hoc significato *Galenus* Commentar. in Aphorismos Hippocratis L.V. ad aph. 65. docet: Omnes præter naturam tumores Hippocrates Oedemata, id est, Inflationes nominat.

b) Hi κατ' ἐξοχὴν vulgo vocantur Oedemata, ceteri alias corporis partes obsidentes, aliis insigniuntur nominibus. confer. *Jo. Zachar. Platner.* Institut. Chirurgiæ rationalis, edit. germ. §740.

c) Vid. *Hipp.* Prognost. 38. *Galenus* Comment. ad hunc locum, Hoc est, inquit, quod proprie Medici Juniores appellant Oedema.



§2. Definitor mihi *Oedema*, quod sit hydrops particularis, quo phlegma interstitia membranæ cellulosaë inundans intumescientiam præternaturalem format. Alii genus proximum Tumorem prædicant *a)*: nec perperam, pro vario morbos dispescendi fundamento.

a) Schelhammer Ογκολογια. pag. 63.

§3. Cum sit illuvies phlegmatica, qua tumor attollitur, *Hydropis* speciem *a)* *Oedema* constituere nullus dubito. Certe hydrops *ἀνα σαρκα* ab œdemate non distinguitur, nisi tumoris extensione, & quæ huicce augmento debentur, symptomatibus. Clariora fient, quæ jam dixi, si conferre invicem lubeat, quæ Celeberr. BOERHAAVE tam de Oedematis, quam de Hydropis *ἀνα σαρκα* essentia tradit *b)*. Conspirat Clariss. LANGHANS, qui docens, hydropem *ἀνα σαρκα* esse nimiam aquæ secretionem in adiposam telam subcutaneam, annotat, quod *Οἰδημα* dicatur, si aqua hæc unice in pedibus continetur, nec ultra ascendit crura, tumoremque ibi aliquem laxum, album & mollem producit *c)*. Propter momenta vero accidentalialia, cujus census sunt, quæ Celeberr. FR. HOFFMANNUS in medium profert *d)*, speciem morbi à suo genere sejungere nolim.

a) Conf. de Gorter Compend. Medic. Tr. 35. §1.

b) Prælect. in Instit. Tom. VI. pag. 84. & 85.

c) Differt. de Consensu partium corporis humani §5.

d) Medic. rat. system. T. IV. Cap. XIV. de Hydrope §26.

§4. Membranam Cellulosam pluribus delineare superfluum arbitror, utpote sagaci naturæ scrutatorum, præsertim Ill. ab HALLER industria eleganter evolutam. Sedem ipsam esse phlegmatis œdematosi, cadaverum sectionibus didici; & suffragio suo thesin tuentur adcuratiores Anatomici. Ita sententiæ Cl. SCHELHAMMERI, qui œdema fieri asserit, sero in mediis



mediis carnibus subsistente *a)*, unicam ex plurimis oppono auctoritatem BOERHAAVII, qui aquam in ipsis musculis rarius reperiri demonstrat *b)*.

a) loc. cit. pag. 62.

b) Prælect. Tom. VI. pag. 84. confer. etiam Tom. III. pag. §17.

§5. Determinatè in *Interstitiis cellularibus* coacervationem phlegmatis, ceu aquæ sanguinis è rubris vasis huc depositæ, tantum non semper contingere, persuasum mihi habeo. Bullulæ, quas sectionibus anatomicis intentus in corporibus hydropicis sæpe numero intuitus sum, videbantur mihi id genus cavernulæ, liquamine hydropico turgentes. Nec pudet subscribere hypothese, quæ phænomenis extricandis adposite servit, & in praxin, si vel fallat, ne minimum infert damni.

§6. Alia species, quam tamen Celeberr. BOERHAAVE rariorem dicit *a)*, quoad theoriam non æquè mihi probatur. In ea omne momentum revocant ad venarum lymphaticarum polychymiam ac dilatationem. Inficias quidem non iverim, esse interdum, ubi hæcce vascula distenduntur; verum, an ipsa sola tantis efferendis intumescentiis respondeant, dubito: nec capio, cur non inæqualis potius inde emergat tumorum superficies? nisi quidem omnes Cellulosæ fibras fingenti fistulosas *b)*, infinitum vasculorum numerum adstruere lubeat. Insuper hanc thesin ad explicandas observationes adhibiturus, hypothesein hypothesei cumulare cogitur. Sed quid arbitrariis moror? sua cuique stet opinio, modo nec sit valde absurda, nec perniciofa.

a) Prælect. T. VI. p. 84.

b) De hac hypothesei *Bærbaviana* conferri meretur *Hallerus* in *Element. Physiol.* T. I. pag. 23. seqq.

§7. Saltem monere liceat, si forte admittatur Oedema tale, signa tamen, quibus humorem in suis canalibus coercitum percontari satagunt, lubrica admodum esse & incerta. Etenim minorem tumoris inertiam, qua sinus digito impressus satis cito iterum evanescit, tenuiori phlegmatis consistentiæ Ill. DE GORTER rectè videtur tribuere *a)*. Et quoad alterum signum, alternans tumoris augmentum atque decrementum non minus obtinere poterit aqua in cellulis stabulante. Fac enim, quod contrariæ sententiæ Patroni de lymphaticis vasis affirmant, actionem tubulorum adiposæ resorbentium alterna vice intendi atque remitti, & inconstans tumoris volumen in aprico erit.

a) Comp. Medic. Tr. 35. §9.

§8. *Phlegma Oedematofum* tenue, aqueum sæpissime reperitur; serosum, vel seroso-lymphaticum vulgo adpellant, alii pituitosum. GALENUS substantiam pituitosam & Spiritum vaporosum dicit *a)*. Ill. AB HALLER aquæ alcalinæ proximum reputat *b)*. Eidem simile videtur Gelatinæ tremulæ, in oculis membranæ adiposæ foetus ante adipis glebofi tempora inveniendæ *c)*. Certè tenacitate, crassi, spissitudine variat *d)* in corporibus diversis, varioque morbi statu ac duratione, & à gelatinosa illa indole prorsus haud raro ablu dit: sive stagnando tandem alteretur, sive alienatum ex sanguine secedat, sive vitiatas particulis undecunque allatis imbuatur.

a) De Arte Curat. ad *Glauc.* L. II. Cap. 3.

b) Prim. *Lin.* physiol. §61.

c) Elem. physiol. T. I. pag. 44. conf. *Bærb.* prælect. T. III. pag. 102.

d) de *Gorter* loc. cit. Tr. 35. §2.

§9. Sunt quidem, qui in determinando Oedemate phlegmatis constitutionem attendunt; ita v. c. ab ipso distinguendum putant tumorem Aquosum *a)*. Verum enim vero peritissimorum virorum conjecturis sæpius illudit vera materia

riæ constitutio, non nisi sensibus experimentisque examinata adcuratè cognoscitur. Latiori itaque vocabuli significatu omnem tumorem, qui signa mox narranda offert, œdematosum denominare consultum est. Si quid vero in hoc illove de phlegmatis mixtura specialius augurari licet, id varietatum classe comprehenderim, in formanda indicatione magno sæpius cum fructu attendendarum.

a) vid. J. J. *Waldschmidt* opera medico - practica. pag. 396.

§10. *Signa* scilicet *Diagnostica* notantur ferè sequentia: 1. Morbus particularis est, ad satis prolixam tamen frequenter excurrit peripheriam; 2. diffusæ & planioris faciei tumor est, nec præruptam exhibet eminentiam; 3. modo mollior, modo paulum renitens Iners est, seu Laxus, & impressionis vestigia aliquandiu servat; 4. pallidi est Coloris, & frigidus, æstu, rubore, dolore inflammatoriis caret, nec nisi aliquo tensionis & ponderis gravitantis sensu stipatur.

§11. Hæc sunt, quæ Necessaria dixeris symptomata, quæque œdematis à quocunque morbo alio differentiam constituunt. Præter ista multi ægri ne minimum incommodi experiuntur; unde illud etiam sanis contingere FR. HOFFMANNVS docet a). Aegritudines ceteræ, quæ alios quandoque vexare solent œdematosos, minus constantes observantur, & variant, quas itaque hoc loco fileo.

a) Medic. ration. System. T. IV. Cap. XIV. de Hydrope §26.

§12. *Causam œdematis proximam* sistit phlegma in membrana cellulosa, excedente copiâ stagnans. Diathesin, quæ istam accumulationem & stagnationem præcedat, multi infamant solum impeditum lymphæ per suas venas refluxum. Alibi quidem suis cancellis illam adhuc contineri reputant §6; interdum autem facta diæresi in Cellularia interstitia profund-

di.



di. Vitium hoc quandoque in computum venire non negaverim: nec tamen semper obtinet, nec solum ubique sufficit. Quando enim citatior phlegmatis congestio evenit, cur non potius efficitur inflammatio? Cur venarum varices, ab utero expanso nati, non semper conjunctos habent pedes œdematosos? Quî stupendæ amplitudinis œdemata, quæ BOERHAAVE recenset *a)*, tam feliciter persanata fuere, cum vasorum lymphaticorum ruptiones valdè sint pertinaces? Et quæ hujus generis opponere liceret dubia plura.

a) Prælect. T.III. p. 518.

§13. Summos in hac thesi consentientes habeo Pathologos. BOERHAAVE *a)*, Causa est, inquit, quando pars aquosa sanguinis ex rubris vasis in panniculum adiposum effunditur. Ab HALLER *b)* eandem obesitatis atque hydro-
 pis causam evincit, rubræ nimirum sanguinis partis inopiam. De GORTER de Oedemate tractans *c)*, Generatur, inquit, ut generalis hydrops sine vasorum ruptione. LANGHANS *d)* affirmat, aquam hydropicam neque per vasa lymphatica, neque per serosa secerni, quæ in imis pedibus nondum demonstrata sunt, sed per ipsos rubris continuos canales, qui per omnem subcutaneam cellulosa migrant. Sed quid in Speculativis nunc versans, Auctorum opiniones conquiro? Spectet, quæso, quis sanguinis, universalis secernendorum promptuarii, & ipsius gelatinæ adiposæ mixtionem, quantitatem, motum; ostiorum adipem adducentium & reducendum, atque fibrarum membranæ cellulosæ texturam, conformationem, cavitates, vires; humores peregrinos sive naturales, sive præternaturales adipem inquinantes; denique constitutionem partium vicinarum & consensualium: spectet horum momentorum possibiles modos; persequetur certè semina innumera, quibus singulis sua competit, phlegma in contextu cellulari accumulandi potestas. Mihi delicias has
 theo-



theoreticas sigillatim excutere, & in consueto pathologico nitore proponere inpræsentiarum non vacat.

- a) Prælect. T. VI. pag. 84.
- b) — prim. lin. §170.
- c) loc. cit. Tr. 35. §23.
- d) Dissert. de Consensu partium C. H. §5.

§14. Nec magis utilis futura est id genus disquisitio in exercenda praxi. In confessis est, eam nos stringere ingenii imbecillitatem, ut morborum individualium essentiam complete rimari, & geometrico rigore dimetiri, ne unquam polleamus. Potius in emolumentum cessura videtur doctrina pathologica ea, quæ causas Antecedentes expendit, adeoque in illa inquirat vitia, quæ prima cognoscere tenetur medicus, & adversus quæ medicamentis pugnet, necesse est, ut optato Sanationis scopo potiatur. Hæc verum therapie fundamentum, & agendorum declarat punctum princeps.

§15. Scilicet ignoramus causas proximas, nihilominus plures felicissime curamus morbos, medicatione quidem summe rationali. Placent hæc æquo cuique rerum arbitro, qui præcipuum universæ Medicinæ fundamentum in ipsa hominis Natura situm esse cognoverit. Hæc suis privatis a Sapientissimo Creatore instructa viribus, Oeconomiae humanæ functiones peragit, easque ex legibus, quas in agendo sequitur, ita moderatur, ut Sanitas perduret, atque vitia partium Corporis per morbos forte effecta, iterum emendantur. Hanc ob causam officio nostro satisfacisse putamur, si quam Natura actiuosa medelam molitur, attendentes, id quod ipsi impedimentum facessit, per artem infringimus, nulli dubitantes, dummodo satis vigeant vires, nec materiae morbigicae resistantia insit insuperabilis, Coctionem Crisique salutare, nisi ex accidenti turbentur, certo esse insecuturas. a)



- a) Quæ brevissimis propono, egregiis momentis illustrata evolvas apud veteres æque, Hippocratem maximè & Galenum, ac apud recentiores, inter quos exempli loco excitare licet varia scripta *Fr. Hoffmanni*, præsertim Dissert. cui titulus: de Naturæ & Artis Efficacia in Medendo, van *Geuns* in Dissert. de eo, quod Vitam constituit in Corpore Animali, & qui primus nominandus erat Excell. *Gaubium*, qui in Institutionibus pathologiæ Medicinalis haud plebeio sermone de Natura humana ejusque Viribus passim disputat.

§16. Ipse nunc respectu Hydropis & nominatim Oedematis regia ista via incedere vires periclitabor. Vitia prædam aliquot, quæ quando morbum nostrum legitimè debellare velimus, elaborare decet ut removeantur. Ita Oedematis *Differentias generales* seu *Classes* adstruam, porro tamen in sua genera, species, & varietates dispendendas: partim pro variis Naturæ sic dictis Moliminibus, partim pro phlegmatis œdematosi indole, pro parte corporis afflicta, pro ægri constitutione privata, aliisque conditionibus singularibus. Pariter medicamenta Discutientia alia atque alia indicari in singulis divisionibus, nec tironi medico obscurum fore censeo.

§17. Per observata practica, quæ unice nunc consulenda sunt, meditationem circumducens, invenio sequentia vitia, sollicitè disjungenda. 1. Obstaculum gravius, venis sanguiferis majoribus adplicatum; 2. Imbecillitatem Naturæ; 3. Evolutum, nimiumque in corpore abundans serum Excrementitium; 4. varios veri nominis Morbos Primarios; 5. denique plures diversi generis causas unitas. Arcti dissertationiculæ limites materiæ pro dignitate explanandæ spatium denegant. Ne tamen asseruisse videar, quæ probare non possim, per singulas classes exempla quædam memorasse interest.

§18. Ut ratio *Obstaculi*, reditum succi venosi retardantis pateat, Clariss. SCHELHAMMERUS a) venam quandam
ex

ex majoribus ligare, pauloque post partem, ex qua illa reducit sanguinem, incidere præcipit, quo facto non sanguinem, sed aquam promanare affirmat. Veritatem asserti confirmat Canis hydropicus LOWERI *b*). Scilicet retardatur hac ratione non solum refluxus sanguinis rubri, sed quoque humorum ipsi refundendorum; ita gelatina adiposa usque in loculos cellulosos deponitur, quin copiosior secernitur, si systematis arteriosi motus simul sit languidior, nec proportionata ejusdem succedit resorptio. Inde non potest non in membrana cellulosa fieri congestio, partes contegentes expansura. Heic quoque est, ubi symbolam suam conferunt turgentes venæ lymphaticæ §6.

a) loc. cit. pag. 63.

b) Vid. *Bærb.* Prælect. T. I. pag. 580.

§19. Obstaculum tale infert compressio venarum in equitatione, per vincturas arctius adplicatas, per uterum feminæ foetu, hydrope, mola expansum *a*), funiculum umbilicalem collo foetus circumpositum *b*), scirrhosos aliosque partium tumores *c*), quin solius adipis insignis augmentum *d*), & quæ sunt hujus generis plura.

a) vid. *Platneri* Institut. Chirurg. ed. germ. §735.

b) ibid. §756.

c) de *Gorter* Comp. Medic. Tr. 35. §5 & 6. Interfui ego sectioni mulierculæ, quæ cum primo pedes oedematosos gestaret, tandem hydrope Ascite defuncta fuit: huic glandula, Pancreas dicta, in insignis voluminis scirrhum indurata, & situ alienato corporibus vertebrarum dorsi adhærens à dextro truncum venæ Cavæ deprimebat.

d) ab *Haller* prim. lin. §25.

§20. In Curatione dicto obstaculo obviam ire oportet; & quæ illud remonent, discutientem simul sæpissimè præstant opem. Licet enim tumorem nostrum directè non aggrediantur, impugnant tamen impedimentum, naturæ oppositum; quo sublato hæc absque ulteriori medicaminum auxilio me-



dicationi perficiendæ par redditur. Uti v. c. quotidie videre est in gravidis, quæ partu excluso intra paucos plerumque dies à pedum tumore liberantur.

§21. In secunda classe *Naturæ* a) *Imbecillitas*, aliis *Debilitas* vocata, ponit defectum virium humanarum, eum quidem, ex quo functiones humanæ nec vigore, nec constantia plenæ Sanitati congruis, perpetrantur; neque tamen tantæ efficiuntur ægritudines, ut veros inter morbos collocent vitium b). De Origine hydropis ex imbecillitate, commentatur Illustr. VAN SWIETEN c), quod orificia venosa humores imbibant proportionaliter ad circulationis vires, & quod in summis languoribus diutius videatur persistere vis evacuans arteriæ, quam vis resorbens venæ; hinc in omni corporis diathesi, in qua vitalis vigor imminuitur, aquosa incipiant accumulari. Et Ill. AB HALLER d) declarat, in languido corpore non adipem deponi in cellulas, sed gelatinam quandam; quæ summo pathologo BOERHAAVIO e) primum hydropis signum videtur.

a) Controversias circa *Naturæ* conceptum agitata, meas jam non facio. Ipse hoc vocabulo complector causas viresque functionum humanarum. vid. *van Geun's* dissert. cit. §3.

b) Conf. *Gaubius* Instit. pathol. §38 & 40

c) Comment. in aphorism. *Bærh.* T. I. ad §44.

d) prim. lin. physiol. §25.

e) Prælect. T. III. pag. 102.

§22. Duplex est *Imbecillitatis* genus: alterum cum partium firmarum textura p. n. debili, cum rigida alterum nescitur a). Utrumque propitium est ingenerando œdemati. Ita de priori genere loquuntur, qui procatareticis œdematis causis annumerant temperiem phlegmaticam, vivendi genus lautum & otiosum, abusum potus aquosi, inprimis calidi, ve-

næ

næ sectiones nimias, cet. Posterius contra ante oculos habent, qui senii, liberalioris spirituosorum, acidorum ingurgitationis, anxiarum mentis cogitationum, multorum dudum affligentium morborum, cet. mentionem faciunt *b*). Interdum particularis quoque incusanda venit imbecillitas, oriunda v. c. ex læsione parti singulari adplicata; ita à subluxatione malleolorum tumet pes inferus *c*).

a) Distinctio hæc notioni §o præcedenti not. a. exhibitæ accommodatur, & comprobatur experientiâ, qua tam in laxo, obeso helluonis, quam in rigido decrepiti senis corpore functiones torpescere novimus, & ab effectu æstimamus causas, vires innuo languentes. Ceterum utrum vires partibus firmis essentialiter competant, & modi sui rationem sufficientem habeant in modo texturæ, sub litem adhuc revocatur? Equidem nexum intercedere essentiæ inter modum atque virium, inde colligo, quoniam mutato priori semper & uniformiter mutatur quoque posterior; unam tamen eandemque rem Essentiam, quam dicunt, partium corporis, atque Vires vix existimarim; hæ additæ tantum ac harmonicæ mihi videntur. Amplas hujus thesæcos demonstrationes exstruere, instituti ratio non est, unicui tamen illustrationi serviat exemplum. Quippe Debilitatis, five cohæsionis partium componentium imminutæ, species diversæ statui vis vitalis nectuntur planè opposito v. c. Laxitas Torpori, & Gracilitas Vividitati, s. irritabilitati; vid. *Gaub.* loc. cit. §194 & 198.

b) vid. *Platner* l. c. §737. *Heisteri* Instit. Chirurg. T. I. pag. 348.

c) Hunc casum recenset Beatus Al. *Camerer* in Dissert. quæ inscribitur: Historia pedis Tumidi. pag. 10.

§23. Circa therapiam hujus œdematis versantur institutiones practicorum tantum non omnes; quin plures de solo hoc hydropis genere tractant. Hic enim accommoda sunt, quæ commendant, pharmaca stimulantia, roborantia, calefacientia, & sic dicta Hydragoga specifica.

§24. Quoad tertiam classẽ, num *serosus latex* peculiari via ex suis ductibus in cellulosæ cavernulas transmigret,



non disceptabo. Ratio nascendi œdematis nec iis difficilis adparebit, qui præter secretionis ambages aditum dari pernegant. Huc spectant verba immortalis BOERHAAVII *a)*: Quando vis vitæ debilitata vix liquores promover, & sanguis aqua potius quam oleo abundat, tum vero in exhaustas macilentæ corporis cellulas deponitur aquosus latex, distendit folliculos, qui musculis incumbunt, & nascitur leucophlegmatia. Hic obtinet diathesis illa hydropica, quam §13 ex HALLERO dixi, ratio nimirum feri ad rubras sanguinis particulas aucta.

a) Prælect. T. III. pag. §16.

§25. Plura certè apud practicos prostant exempla eorum, qui & post suppressam excretionem cutaneam, & post retentionem Urinæ violentam hydropem reportarunt, quam ut de seminio isto efficaciori ambigere quis possit. Hanc ob causam judicat BOERHAAVIUS *a)*, quod siccissima in diæta corpus fieri possit hydropicum, tum, quando arteriæ non tantum perspirant, quantum venæ ex aëre resorbent. Et de urina retenta Excell. Beatus D. D. MOEGLING hoc instituit præsagium *b)*: Alias urinæ suppressio brevi tempore vel mortem, vel hydropem producit.

a) Prælect. T. III. pag. §03.

b) Tentam. semiot. P. I. pag. 19. In nosocomio Argentinensi vidi feminam hydropicam, quæ causam morbi antecedentem ne ullam noverat, nisi quod lotium summe urgens reddere pro vitæ conditionibus iterata vice non licuerit.

§26. Medicamenta, quæ huic œdematum generi conveniunt, sunt diuretica, diaphoretica, ac sudorifera, passim à practicis laudata.

§27. Oedemata quarto loco numerata, quæ alii cuidam *Morbo primario* natales debent, primo statim intuitu ab invicem discrepant; sive pluribus classibus distinguere, sive in ordines classem subdividere libuerit. Succrescunt quippe alia per consensum, & merè symptomata sunt; alia contra sunt metastatica. Quæ utrinque tam de symptomata quam metastatica indole participant, in quintam divisionem differo.

§28. *Symptomaticum œdema* sola vi morbi producitur. Triplex hujus pro triplici geneſeos ratione, constituitur genus. Primum mediante interstitiorum contextus cellulosi consociatione *a)* per communicationem mali supervenit in aliis hydropis speciebus. Nemini hoc intellectu difficile erit, qui apertum iter, quo phlegma ex parte corporis in aliam pergit, intuetur *b)*. Alterum genus ex sanguine corrupto, adipem adeò largiente vitiatum, per oscula reducentia ægrius, & minori, quam par est, in copia resorbendum derivatur. Familiare hoc est morbis chronicis cachecticis *c)*. Genus tertium comitatur morbos, qui partium firmarum tonum deſiciunt, & universalem inferunt imbecillitatem; cujus census sunt hæmorrhagiæ, diarrhœæ, phthisis, cet. *d)*. Ratio, qua isthoc generatur, dicta fuit §21.

a) De communicatione telæ cellulosæ evolvi merentur ab *Halley* *Elementa phyſiol.* T. I. pag. 14. seqq.

b) Luculentam explicationem, exemplis simul corroboratam, dedit *Langhans* in citata Dissertatione de Consensu partium C. H. Sect. I. de consensu Tunicæ Cellulosæ.

c) Huc faciunt verba M. A. *Severini*, qui L. II. Cap. 5. de Recondita Abscessuum Natura, Una est, inquit, Cachexia, quæ veluti fons uber solet plerumque materiam subministrare crebrorum abscessuum.

d) *Platner* l. c. §737. & *Heister* l. c. pag. 348.

§29. Infaustum ancipitis ægrorum status signum ut plurimum exhibet hoc symptoma. Et ad morbum primarium me-



medelam convertendam esse omnem, sponte patet: sic enim confidimus, symptoma ultra suum morbum non esse duraturum.

§30. *Oedemata Metastatica* nascuntur post Crisin a) morbi imperfectam. Excitantur adeoque à Naturæ viribus, materiam morbificam, quæ plenè exturbari nequit, in telas cellulosas deponentibus b). Huc quadrat dictum divi Hippocratis c): Si eorum, quæ excernuntur, superfit pars aliqua, tum in morbo abscessus est facilis. In genere quidem affirmare licet, depositiones ejusmodi criticas beneficio consensus vasorum contingere d): in systemate enim sanguifero perficitur Coctio e). Utrum autem ratiocinii quid tribuendum sit Naturæ, quæ pro arbitrio, modo materialem, modo nervosam procuret metastasin, miasma peccans nunc in hanc, nunc in illam congerat corporis partem: an quod majori veri specie contenditur, metastaseon varietas ex physicis causis sit determinanda, & explicanda secundum peculiare leges, non quidem simpliciter mechanicas, sed medicas, œconomiae animalis privatas, fusè perquirendi spatium non suppetit f).

a) Vaga apud Pathologos est termini *Criseos* significatio. Conf. *van Swieten* Comment. T. II. ad §587. Mihi jam denotat solutionem morbi quameunque per vires Naturæ. Hunc conceptum, ceu pluribus adoptatum stabilivit Cl. *Conrad* in dissert. de Depositionibus Criticis §1. Ex eodem non amplius abscondita videbitur thesis, quod etiam in Chronicis morbis locum inveniant Crises. Vid. laudati *Conrad* diss. cit. §1. not. a. & *Wegelin* dissert. de Metastasi. pag. 4.

b) *Conrad* l. c. §16. pag. 26.

c) Epidem. VI.

d) De hoc consensu vid. *Langhans* diss. cit. Sect. II.

e) *Wegelin* loc. cit. pag. 3.

f) Multa eruditione doctrinam hanc pertractavit *Conrad* l. c. §16. sqq.

§31. Utut incompletam originis horum œdematum theoriam exhibuisse videri possem; ipsa tamen ex observationibus satis superque declarantur. Plurima, eaque varii generis offeruntur practicis. De febribus intermittentibus postea ex professo dispiciam. Acutas febres œdemate terminari ex curatione suspecta, abusu in specie volatiliū, Celeberr. STAHL observavit *a)*. Nec disparem conjecturo rationem tumorum, qui abscessus, empyemata, scabiem retropulsam cet. *b)* excipiunt. Licet enim his in casibus perturbationes criticæ attentionem Medici sæpius subterfugiant: non tamen nisi vis vitæ moleculas morbosas intra vasa systematis circulatorii revocat, ibidem præparat, & ita morbum priorem quidem solvit, sed facta abscessione novum morbum procreat.

a) In Dissert. de Raris Morbis. Al. Camerer in dissert. quam inscripsit: Historia Pedis Tumidi, in qua tumorem ex Erysipelate & Febre Petechiali ortum examinavit, pag. 10, ubi dictam *Stablii* dissertationem allegat, asserit, nota ipsi esse exempla, id ipsum in gradu non levi perpefforum, qui morbum tantum non in solidum naturæ commiserant & superaverant.

b) Platner loc. cit. §737.

§32. Quoad praxin, morbum primigenium sedulo respicere, & inde signum non tantum status ægri anamnesticum colligere, sed etiam materiæ metastaticæ indolem, quantum licet, augurari è re est. His enim usi indicantibus, congrua feligere possumus medicamina discutientia.

§33. Maximus denique Oedematum numerus continetur *Classe quinta*. Jam recensitas causas antecedentes plures, vel pauciores multis invicem concurrere posse modis facile intelligitur; sua singulæ agunt ratione, suoque in singulis ægris gradu, in eundem tamen, colluvie phlegmatica adiposam

C

inun-



inundandi effectum conspirant omnes. Pariter in suscipienda legitima cura singulæ indicantium jure attentionem exposcunt, suumque majus minus habent momentum in formanda indicatione. Lubens autem fastigium heic impono præceptis generalibus, præsertim cum luculentum robur huic classi accessurum sit ex infra dicendis. Limites enim longius excedere deberem, si per innumera exempla ire propositum foret.

§34. Potius his prælibatis pedem promoveo ad thema curatius tractandum, ea examinaturus *Oedemata, quæ ex febre Intermittente laborantibus accidunt*. Adhuc miror insignem horum numerum, quæ Argentorati nuper observavi, cum, quod grato animo publice testor, informante Clarissimo atque Experientissimo D. D. BOEHMIO, Xenodochii civici Argentinensis Medico Primario in Clinicis proficere mihi contigit. Ipsa eorum frequentia rationem subministrat, unde intelligo, cur plerique inter causas prædisponentes recitent istam Intermittentem.

§35. Plurimos tumores notavi Pedum, nec infrequentes Faciei, vix unum alterumve Brachii; sæpe illi pedum atque faciei una infestabant. Ratio, cur hæc illave corporis pars potius occupetur, non ubique in propatulo est: interdum tamen privata alicujus partis dispositio, quam v. c. ex læsione, aliave ex causa accepit, conjecturæ locum dabit a).

a) Ita peculiare seminium naturale quærunt in Pedibus, quia sanguinis motus ibidem fit valde imminutus. Vid. *Langhans* diff. cit. §5.

§36. Ut distinctè doceam, tramite, quo cœpi, pergere, discrepantia oedemata distinguere, & seorsim contemplari operæ pretium judico. Nimirum obvia illa sunt ex classibus,

bus, quas antea disposui: *Simplicia* ex classe quarta, ejusque ordine utroque, & alia, quæ *Composita* dixeris, vel *Complicata* ex classe quinta.

§37. Primum itaque locum occupat *Oedema Symptomaticum*. Præ ceteris hoc observatur frequentissimum. Accedit intermittentibus per longius jam tempus protractis, autumnalibus præsertim quartanis *a*). Ceterum febrilis morbus permanet. Ipse tumor increscit gradu lento, principium nanciscitur in pedum malleolis, & inconstans esse solet, augetur, iterumque decrescit per noctem inprimis & servato regimine commodo. Hæc incunabula plerumque sunt hydro-
pis, quo subinde terminantur febres diuturnæ *b*).

a) Vid. *Sydenham* Opera medica. Tom. I. pag. 58. *Fr. Hoffmann* Medic. rat. systemat. T. IV. Sect. I. Cap. II. de Febre Quartana §20.

b) Vid. *Boerhaave* Aphorismi de Cognoscendis & Curandis Morbis §753. & *van Swieten* Comment. T. II. ad hunc Sum.

§38. Prædisponens, quam dicunt, causa latet in debilitate, conjunctaque imbecillitate, partibus firmis per febrim inducta §28. Sub hac quippe diathesi humores vitiiati ex sanguinea massa abundantius transeunt in loculos adiposæ, ibidemque sensim cumulantur. Recitatu hic dignum est judicium, quod de hydrope febres diuturnas sequuto fert *Illustr. van Swieten* *a*): Febris, inquit, de corpore expulit liquida, sed cocta; potu vero copioso, ob sitim plerumque comitem, cruda ingeruntur, quæ ob debilitatum per febres longas corporis robur, nec moveri possunt, nec expelli de corpore, sed in cavis majoribus & minoribus colliguntur.

a) Comment. T. II. ad §587.



§39. Causas occasionales omnes recensere longum foret: in aprico est, omnes illas potentias hoc titulo concludi, quæ febrim diuturniorem & contumaciorem reddunt, sive ad regimen ægroti, sive ad medendi methodum referantur. Tres tamen memorasse præ ceteris juvat. Scilicet & Venæ sectionem & Catharsin multam hoc nomine infamat Ill. SYDENHAM *a)*, quod in quartana autumnali non absque morbi prolongatione adhibeantur, & symptoma nostrum maturius proleſcent. Hisce addo copiosum medicaminum Attenuantium Salinorum usum, a quo abstinere in quartana prudenter præcipit Excell. LUDWIG *b)*, quod licet sanguinem viscidum resolvant, debilitatem tamen solidorum simul inducant. Suffragatur etiam Ill. van SWIETEN *c)*, qui nocitura putat attenuantia & diluentia in debilis temperiei hominibus, & qui profusis sudoribus diffluunt, dum nimia dissolutio humorum, & solidarum partium debilitas jam adsint.

a) l. c. T. I. pag. §4. conf. van Swieten Comment. T. II. ad §762.

b) Instit. Medic. clinicæ §91.

c) l. c. ad §758.

§40. Fatale plerumque prognosticon præbet hoc symptoma. Summe refractaria tum temporis esse consuevit Febris, & tumor particularis creberrime in universalem grandescit. Celeberr. LOMMIUS prænunciat *a)*, quod quando quartana inveterascit, corpus hydropi exponatur, fereque æger oppressus pereat. Certe vix unquam evadunt ætate grandiores; interdum salutem attulit juvenibus medicatio statim præcipienda.

a) Observ. medicin. pag. 19.

§41. Hæc quippe, uti §29 traditum fuit, primario prospicit febri. Observavi, inquit Celeberr. SYDENHAM *a)*,
frustra

frustra esse, si quis hydropem ex febre intermittenti natum, medicamentis purgantibus tollere conetur, febre illa adhuc durante: febris enim hoc pacto radices profundius agere deprehendetur, non autem amovebitur hydrops. Indicantur vero medicamenta Roborantia. VAN SWIETEN *b)* commendat Cort. Tamarisci, Capparidis, Peruvianum, una cum aromatibus vino austero rubro infusa. Similem virtutem Confortantem, minorem quidem adstrictivam, sed eminentiorem stimulantem exserunt Infusiones Rad. Raphan. rustic. Summit. Absinth. Centaur. min. Baccar. Juniperi, Ciner. Genistæ, quibus symptoma nostrum tum aggredi præcipit modo laudatus SYDENHAM *c)*, quando curatio ejus eo usque non videatur differenda, donec febris recessus cathartorum usum permittat. Nec inferiora his sunt Martialia, morbi genio, & ægri conditionibus accommodata: medente Exp. D. BOEHMIO Argentoratensi, admodum contumaces febres debellatas vidi per Tartarum chalybeatum moderatis salis ammoniaci & nitri dosibus mixtum.

a) loc. cit. pag. 59.

b) loc. cit. ad §758.

c) loco prius citato.

§42. Hac medicatione, præsertim, ubi diæta accommoda jungitur, Natura vires sensim recuperat, unaque cum febre sæpe sæpius etiam fugat malum symptomaticum. Ita testatur Ill. de GORTER *a)*, quod febre suo antidoto bene extincta, sine ullo alio auxilio omnem aquam sua sponte brevi tempore per urinæ vias evacuatam fuisse sæpe viderit. Interdum tamen diutius restitat œdema, & sopita febre morbum secundarium sistit. Tum medicamentis naturam juvare consultum est.

a) l. c. Tr. 35. §11.

§43. Alibi quidem sufficiunt, quæ viscera primæ culinæ debilitata roborant, iisque torpentibus pristinum vigorem reddunt. Nutrimentum ibidem legitime elaboratum universæ œconomiae velificatur, ut functionibus naturalis modus redeat. Hunc in finem modo nominatus de GORTER *a)* medicamenta adstringentia, calida, stomachica, & antiscorbutica extollit, quibus roboratum corpus aquam sponte expellat. Huc quoque pertinere videntur, quæ Celeberr. HEISTERUS de Harrisio refert *b)*, quod non semel per Crocum martis aperitivum, corticemque peruvianum pessimas istiusmodi pedum noxas feliciter sustulerit. Exulēt autem omnino medicamenta purgantia; hisce quiescentem febrim resuscitatam fuisse plus una vice observavi. Proinde ait de GORTER *c)*: Hujusmodi hydrops a purgantibus intenditur, illaque febrim recidivare faciunt.

a) loc. cit.

b) l. c. pag. 351. præsertim de specifico Cort. peruviani medicamento evolvi in hoc passu merentur Ill. Werlhof Observationes de Febris præcipue Intermittentibus pag. 58 sqq.

c) loco antea citato.

§44. Quandoque præterea curandum est, ut tubulorum adiposæ reducentium actio in parte affecta intendatur, quo certior atque citatior contingat discussio. Faciunt huc Momenta, externe applicanda. Primum locum sibi vendicant Frictiones, ope panni calidi ita instituendæ, ut pedes cum rubore calefiant, qui dein fasciis idoneis muniantur *a)*. Deinde haud contemnendæ utilitatis sunt fomentationes, balnea, epithemata sicca cet. roborantia, quæ & stimulantem & modeste adstringentem virtutem simul possident, varia a variis Autoribus commendata *b)*.

a) Heister l. c. pag. 350.

b) Heister ibid. & Platner l. c. §751, & Schelhammer l. c. pag. 66.

§45. Huic œdemati symptomatico subjungendum esset aliud, cui symptomatis nomen æquali imponitur jure. Tale aliquando intermittentem epidemice grassatam comitatum esse, statim in principio febris apparuisse, cumque ipsa iterum evanuisse, per certam relationem novi; ut ita *Constitutioni Epidemicæ* deberi videatur. Verum observationibus, quæ theoriæ extruendæ sufficiant, destitutus illud præterire malo, quam doctrinæ hypotheticæ atque commentis erraticis indulgere.

§46. Alterum, quod simplex vocavi, *Oedema Metastaticum* est. Insequitur hoc intermittentes sæpius autumnales, interdum vernaes, durationis terminum solennem nondum transgressas *a)*. Ab ipso morbus primarius solvitur, ad minimum conspicua ratione mutatur. Æger ceterum corpore satis robusto vigenteque pollet.

a) De hoc Terminò evolvi potest *Conrad* dissert. de Depositionibus Criticis §9. not. ii.

§47. Hujus accessum prænunciare solent præter communia criseos imperfectæ signa, non ubique tamen medico animadversa, etiam dolor aliquis partis inflandæ tensivus, & quandoque titillationis ac pruritus sensus. Ipse natus tumor frequenter est constans.

§48. De Causa Metastatica nemo dubitabit æquus rerum arbitër. Si vel enim angustiore notione, quam quæ §30. not. a. exhibita fuit, Crisin non statuamus, nisi quando subitanea & cum magnis turbis conjuncta morbi fit solutio *a)*; non possum tamen, quin intermittentem collochem inter morbos criticè solvendos. Declarare liceat thesin ex mente Acutissimi SYDENHAM. Docet ipse *b)* quod materia febrilis naturam exagitet quodammodo atque laceffat, quæ excitet in cor-



corpore rigorem atque horrorem, averſationis ſuæ teſtem & indicem, unde primum paroxyſmi febrilis tempus, Exhorreſcentiæ dictum, emergit: quod poſtea hoc pacto irritata natura Ebullitionis tempore, quo facilius hunc hoſtem à ſuis cervicibus depellat, fermentationem aggrediatur, cujus beneficio diſjunctæ peccantis materiæ partes, quæ ſanguini æqualiter admixtæ fuerant, quodammodo aggregentur, atque adeò leviori opera ſubigantur, ut ad deſpumationem opportunæ evadant: quod denique tertio ſuccedente tempore ſymptomata omnia primo leviora fiant, atque tandem planè evaneſcant; Deſpumationis autem nomine nihil aliud vult ſignificatum, quam materiæ febrilis jam ſubactæ & quaſi deviactæ expulſionem, ſeu ſeparationem. Hac theoria nixus Celeberr. Autor Continuarum atque Intermittentium februm diſcrimen in eo maximè verſari concludit c), quod continuæ conceptam ſemel efferveſcentiam *συνεχως* unoque tenore perficiant, intermittentes autem partitis vicibus ac diverſis temporibus eadem deſungantur. Et alibi de morbis acutis agens ait d): Quamvis ſi minus adcuratè, haud tamen minus verè loquamur, iſti etiam morbi pro Acutis ſint habendi, qui licet reſpectu paroxyſmorum, ſi omnes ſimul ſumantur, tardius moveant, reſpectu tamen paroxyſmi cujuſlibet particularis, citò atque etiam criticè ad finem perveniant; quales ſunt febres Intermittentes omnes. Sic quoque van SWIETEN e), Et merito, inquit, tunc criſis vocatur, cum nova ſymptomata oriuntur, & morbus tollitur, vel minuitur, dum vel integrè, vel pro parte excernitur morbi materia.

a) Hanc notionem ex *Galeno* probat van *Swieten* Comment. T. II. ad § 87.

b) Opera omnia T. I. pag. 46.

c) ibid. pag. 52.

d) ibid. pag. 20.

e) l. c. ad § 87.



§49. Hisce præmissis in aprium posita esse videtur possibilitas Metastaseos ex febre intermittente a). Nec dubium relinquitur, hanc ipsam esse œdematis nostri indolem, si insignem, quam febris patitur mutationem §46 justis rationum momentis expendimus. Quapropter Ill. van SWIETEN b), cum ex SYDENHAMO didicit, febrim fugam meditari iisdem gradibus, quibus hoc symptoma supervenit, infert: non videri talem crurum tumorem à mera laxitate fieri, verum aliquid materiæ morbosæ versus has partes deponi.

a) Conf. *Wegelin* Dissert. de Metastasi pag. 2.

b) l. c. ad §753.

§50. *Metastasis* alibi est *Completa*, ut febre omnino soluta omnem mali molem in se jam recipiat œdema; alibi contra est *Incompleta*, ut una cum œdemate aliæ restitent ægritudines; nimirum febris modo in aliam transit speciem, v. c. tertiana in quotidianam, vel si mavis, in tertianam duplicem, nec non in quartanam; modo Lentæ speciem induit; modo circuituum ordinem servat, mutatis tantum paroxysmorum duratione & vehementia, & quæ dantur metamorphoses plures. Ratio non difficulter intelligitur: in completa metastasi universa materia morbifica, in incompleta autem solummodo pars ejusdem in textum adiposum congesta videtur, & morbi conjuncti status a relicta parte derivatur. Perinde, uti quilibet intermittentium paroxysmus solvitur parte materiæ febrilis per crisin expulsa, reliquiæ autem, sive per universum corpus in systemate circulatorio, sive in singulari viscere hæreant, novos usque suscitant paroxysmos, & morbus vere demum solvitur crisi totali, ex pluribus partitis constante. Forsitan metastasis completa crisin particularem ultimam, & reliquas antecedentes illa incompleta excipit?

§51. Non enim definito, eodemque in omnibus ægris tempore evenit nostra metastasis. Primi æque ac insequen-



tium paroxysmorum crisis imperfecta ipsi generandæ par est. Id per experientiam satis comprobatum etiam sana dictitat ratio. Sed properandum est, & ad causas Occasionales dictas pergendum.

§52. Magnum harum esse numerum lubenter fateor; certe innumeras memorare liceret potentias, quibus sua coctionem crisinque legitimam pervertendi competit virtus. Paucas sub examen vocabo, quas optima magistra experientia respectu œdematum qua tales demonstravit: Venæsectiones puta, Purgationes, medicamenta Refrigerantia tempore paroxysmi præsertim propinata, & suppressum Sudorem criticum. Harum contemplationem non parum lucis affundere arbitror hypothesi, qua §30 asserui, quod crisin imperfectam non quæcunque indiscriminatim sequatur metastasis, per Naturæ voluntatem delecta. In singulis enim aliquid dispositionis hydropicæ rimari licet.

§53. Venæsectionum vel abundantius, vel incongruo consilio institutarum, supra §39, ubi de œdemate symptomatico agebam, mentio facta est. Nec tamen, quod multi sibi persuadent, hoc solo nomine nocent; favere easdem quandoque metastasi, certum scio. Idem innuere videtur observatio nunquam satis celebrandi SYDENHAM a), quod venæsectio symptomata illa (quæ inter etiam hydrops) maturius accersiverit, quæ febres autumnales intermittentes in statu declinationis vel comitantur, vel à tergo sequuntur. Rationem explicat Celeberr. LUDWIG b); Vires, inquit, ad materiam morbi mutandam necessarias infringit. Hydropis vero feminium attrahunt ejusmodi venæsectiones, quia sanguinis circulationem languidiorem reddunt, uti §21 demonstratum fuit.

a) loc. cit. pag. 54.

b) loc. cit. §82.

§54. Circa Venæsectiones in intermittentibus administrandas celebriores Practici inter se dissident. Sunt, qui encomiis summis illas extollunt, & sexcenta feliciter curatorum exempla in theseos propugnationem narrare norunt. Alii contra eas per se semper noxias, & casu solum prodesse evincunt, nec suis, quibus nitantur, destituti rationibus. Pace Summorum Virorum quid ipse sentiam, dicere liceat. Scilicet indicari interdum venæsectionem, eamque non tantum mala, quæ à nimia sanguinis copia & rarefactione metuuntur, præcavere, sed ad ipsam febris curam prodesse judico. Quæ enim sanguinis superpondio vires canalium superante, bona continget coctio? quæ absque hac sanabitur febris? Nec terret objectio, quod per ipsos paroxysmos febriles decrementum patiatur sanguinis massa. Primo enim non semper sufficiens videtur hoc decrementum *a)*; deinde non impune istud hoc expectabis, quando plethora & orgasmus sanguinis statim in principio febris plagam facit periculosam, haud raro immedicabilem *b)*. Veruntamen non ita frequenti casu occurrere phænomena, quæ venæsectionis subsidio coercenda sunt, non dissimulabo.

a) Memorabile hujus rei exemplum notavi in nosocomio argentinensi. Aegra quædam ultra quatuor jam menses Quartana detinebatur; cum præter alia plethoræ signa de atroci capitis dolore conquereretur, Exp. D. *Bœhm* venam ipsi secare jussit, tam optato cum successu, ut unicuique postea pharmacum ex salinis & martialibus compositum, eam integritati redderet.

b) Talis est observatio, quam *Werlhof*. loc. cit. pag. 74. not. e. ex *Ballonio* notat, quod Vir nobilis tertiana laborans, ob neglectam sanguinis detractionem obierit; cum quarto paroxysmo, ruptis veluti venis, & facto impetu quodam in partibus internis, magna foras excretio sanguinis sit insecuta.

§55. Quod ad Purgationes in intermittentibus attinet, itidem in diversum tendunt Auctores. De usu abusuque purgantium differens egregie placet Ill. WERLHOF. *a)*. Certe non per contumeliam peritissimus Autor purgationem ineptam, medicastri consuetam in febribus, cachexiæ & hydropis



matrem nominat *b*). Ab eadem sæpius œdema symptomatum §39. Interdum cum motus febriles sopiri, vel saltem mirescere vident, scopo suo se potiri, vana confidentia ducuntur isti medicastri. Sed taceo plurimas inde nascentes metastases; de tumoribus tantum œdematosi moneo, quod contingant frequentius. Hujusmodi evacuationes tum quidem concitatae, quando materia peccans per has excretionis vias eliminari nequit, naturæ molimina omnino frustrantur, crisi quoque efficiunt imperfectam. Proinde paroxysmi sequentes sudore non, uti fas est, satis largo terminari observamus. Privata quoque hac methodo generatur diathesis hydropica, de qua docet Ill. de GORTER *c*), quod nimia evacuatione æquilibrium inter solida & fluida tollatur, boni humores colliquescant, solida laxentur, vis vitalis langueat, & tenues aut visceri humores in laxatis & inertibus vasculis & cellulis colligantur.

a) loc. cit. pag. 24.

b) ibid. pag. 57.

c) loc. cit. Tr. 35. §13.

§56. Medicamina Refrigerantia memorans, fidem habeo relationi Amici fide digni. Narrabat hic ægrum à quartana liberatum, sed hydrope postea defunctum, qui tempore Ebullitionis febrilis, æstu sitique vehementi discruciatum, aliquot cochlearia potionis alicujus sic dictæ Temperantis ingurgitaverat. Theoria neutiquam adversatur. Etenim dicta medicamina tum minuant calorem, quando compescunt motum *a*), adeoque alterant motus illos, qui ad coctionem perfectam necessario requiruntur, unde etiam crisis imperfecta, quam presso pede sequitur metastasis.

a) de Gorter loc. cit. Tr. 87. §3.

§57. Oedemata, quæ post Sudationem paroxysmos ordinario finientem, cohibitam, adeoque miasma peccans non universum excernentem suboriuntur, forte quis in generum compositorum numero ponat. Quanta enim sit vis feri ex-
cre-

crementitii intra corpus retenti supra §24 expositum fuit. Si tamen medendi ratio spectatur, œdemata hæc nihil plane differunt à ceteris metastaticis simplicibus: & pro hac causa sudorem suppressum occasionem tantum vocare malui, quam generum multitudinem præter necessitatem exaggerare.

§58. In Prognosi formanda metastasis hæc præ multis alias contingentibus benignior habetur, utpote partem corporis petens minus nobilem, & à vitæ penetralibus remotam. Interdum sponte sua evanescit tumor; sed caveant postea ægri ab omni diætæ errore; post talem enim, quin ad variantem cœli tempestatem consopitum malum aliqualem sui memoriam revocare amat. Quando completa existit metastasis, vix metuendum est, ne ex usu medicaminum utut validiorum revertatur febris. Proinde nunquam molestum fuit SYDENHAMO, quoties hunc morbum natum audiit atque intellexit, & de rei exitu omnia bona tunc temporis animo concepit *a)*. Alibi, ubi vel ex neglecta medela, vel ex refractaria, quæ quandoque obtinet, indole non discutitur, cum majori, minori molestia in senium usque toleratur; tum autem recedens tumor mortis imminens fit nuncius. Quod in scirrhum quandoque degeneret, fides sit penes Autores *b)*.

a) vid. Opera sæpius citata T. I. pag. 59.

b) Schelhammer l. c. pag. 65.

§59. Ad therapiam devolvor. Depositio quidem critica si incompleta fuerit, & morbum primarium in totum non amoverit, huic primum & illico obviam eundum esse censeo. Materia enim deposita quod iis scateat moleculis, quæ olim sanguini admixtæ febrem accendebant, valde probabile videtur; & eadem iterum resorptæ quantas effecturæ sunt turbas *a)*? Certe! superstitie febre purgantibus hydragogis tumoris discussionem tentare, periculosum est. Fusius hoc non declarabo, cum passim jam noxas ex incauto purgantium usu oriundas narraverim, & ipsum ubique atro carbone no-

rent peritissimi Practici. Nec nisi casu proficua existimo Externa, quæ validam in fibras virtutem exercendo, fluidum œdematosum intra vasa circulantia repellunt *b*).

a) Hinc repetenda videtur miseranda conditio ægri sequentis. Adolescens ex quartana autumnali laborans, altero mense metastasin incompletam patiebatur; febris tum in duplicatam abibat, paroxysmis minus vehementibus conspicuam. Primo intumuerant pedes, sed non obstantibus medicamentis hydragogis crescebat tumor, ut abdomen quoque phlegmate obrueretur, donec continuata diu aquas expellendi methodus tandem satis efficax erat, & notabile contingebat tumoris decrementum. Verum per metastasin aliquam nervosam hydropermatum terminatum fuisse puto; æger quippe mœstis anxiiisque mentis cogitationibus per intervalla agitabatur, aliena loquebatur, & nescio qua de causa ad supplicium se raptum iri dictitabat. Interim febris statò tempore recurrere pergebat.

b) Huc spectat casus, quem Fr. Hoffmann recenset loc. cit. Sect. I. Cap. II. obs. 2. quod œdemate per externa discusso, postea tamen redierit febris, & æger hydropicus factus extinctus sit.

§60. Quando autem metastasis completa est, vel vestigia morbi febrilis legitime deleta sunt, de discutiendo œdemate cogitare tuto licet. Ill. van SWIETEN nimis timidus cathartica reformidat, frictionem partium tumentium, & vini medicati ex amaris roborantibus & aromaticis usum suadet *a*). Sic quidem fiet interdum, ut excitatis naturæ viribus superetur malum secundarium. Sæpius tamen iis non auscultat, tumque nullus dubito, cum SYDENHAMO *b*) ad Cathartica confugere. Quamvis enim hæc ipsa per febris decursum incaute repetita metastasi ansam præbuerint, soluta tamen febre ejusmodi suspicionem non amplius incurrunt; nec tum temporis morbum primum, uti quidem in œdemate symptomatico §43, reducere ea observatum est. Ægri simul ea solet esse conditio, ut validiora hæc pharmaca facile ferat. Qualia præcipue exhibere conveniat cathartica, pluribus docet sæpius citatus SYDENHAM in tractatu egregio de Hydrope *c*).

a) l. c. T. II. ad §753.

b) l. c. pag. 59.

c) ibid. pag. 335.

§61. Sunt alia oedemata, ubi neque hæc procedit medicatio. Utcunque Naturam per purgantia sollicitare, materiam oedematofam ex loculis tunicæ adiposæ evocare, & per intestinorum tubum ejicere allabores, in cassum tamen adhibentur omnia, & persistunt tumores. Causam hujus phænomeni quæsierim in indole phlegmatis, resorptionem per oscula reducentia respicientis. Etenim medicaminibus heic commendandis, quæ humorum, & præcipue phlegmatis nostri visciditatem attenuabant, exoptatam sanationem omnino obtentam fuisse, observationes docuerunt. Ne theoretica averfari videar, brevibus argumentis hanc phlegmatis critiche depositi tenacitatem illustrare juvat.

§62. Sive massæ sanguineæ, sive fluido nerveo, sive succo pancreatico, sive alii cuidam humori potius inhæreat miasma febrile; varia quidem in diversis febris speciebus ejus est mixtio ratione qualitatis æque ac quantitatis: ratione autem cohæsionis semper & ubique eo peccare videtur vitio, quod Pathologi Tenacitatem Mucosam, seu Visciditatem appellant. Scilicet persuadent id: sanguis ex vena ægri febrientis detractus, quem crusta crassa, mucosa obductum intuitus sum; sanguis ægri a febris impetu morientis, qui in gelatinam tremulam per omnes venas coivisse visus est *a)*; victus glutinosus, aliæque potentiae, quæ humores inviscant, & inter causas intermittentium procatacéticas militant *b)*; eadem potentiae continuato errore admissæ, quæ febrim reddunt graviolem, contumaciolem *c)*; medicamenta attenuantia, quorum virtus antifebrilis satis explorata est *d)*; & denique dicta tenacitas eleganter servit pluribus enodandis phænomenis, in febre obviis. Suffragia quoque celebriorum Medicorum in hac re excitare liceret *e)*. Quis itaque dubitabit, simile esse vitium phlegmatis, per crisin in telas cellulofas congesti.

a) Haller prim. lin. §156.

b) Ludwig Instit. clinicæ §72.

c) ibid. §76.

d) ibid.



d) *ibid.* §92.

e) *Conf. Baerb. aphorism. 755, & van Swieten Commentar.*

§63. In hoc rerum statu prudens Medicus e penu pharmaceutica promet, quæ humores viscidos dissolvunt, fibrasque blandis incitant stimulis, diuresin ac diaphoresin excitant. Pro usu interno magnæ virtutis esse cognovi Salia mediæ naturæ, præsertim cum principiis vegetabilium amarificantium v. c. in infusis juncta. Vere polychrestum in multis ægris observavi Sal Ammoniacum, largiori dosi dandum. a).

a) Hoc inter specifica numerant antifebrilia. *Conf. W. W. Muys dissertatio de Salis Ammoniaci præclaro ad febres intermittentes usu, & Werlbhof l. c. pag. 44.*

§64. Eundem effectum etiam machinamur mediis Resolventibus Externis, tam iis, quæ vi mechanica nexum molecularum firmitus coherentium destruunt, cujus generis sunt Frictiones; quam quæ intra vasa cutis bibula recepta, humores quibus commiscuntur, incidunt, & partium firmarum vim vitalem instigant, uti Balnea virtute plantarum resolutivum, discutientium, & Salium lixivorum imbuta.

§65. Per therapiam hanc eo persæpe res ægri deducuntur, ut subjuncta alibi Confortantia, alibi Cathartica sanationem omnino perficiant. Sin tum non discutiatur œdema, vix quicquam spei supererit, sed permanens habetur tumor, quem æger ut exactiori regimini mancipatus cum patientia ferat, monendus est.

§66. Forte tamen quis phlegma accumulatum incisione, beneficio cultri chirurgici facta evacuare satagat. Fateor, non plane omni ratione destitui hunc medendi modum. Prostant exempla hydropicorum, quibus spontanea ruptione aqua effluxit, & sanitas rediit a); nec desunt Chirurghi, qui medicationem hanc imitati voti se compotes factos esse gloriuntur b). Verum de nostro nominatim œdemate nulla reperio instituta pericula; nondum satis explorata est constitutio phlegmatis,
an



an ejus sit consistentiæ, ut per vulnus inflictum emanare absque difficultate possit? annon quandoque ejus sit, vel accedente aëre fiat qualitatis, ut vulneris consolidationem impediat, & ulcera mali moris generet? Ex his rationibus ancipiti & incerto Scalpello ego quidem vix fidam.

a) Vid. ab *Haller* Elem. physiol. T. I. pag. 14.

b) *Prosp. Alpinus* de Medicina Ægyptiorum L. III. Cap. 13. tradit, quod veteres Ægyptii homines hydropicos pharmacis quidem non vexarint, sed introduxerint per cutim acus fila trahentes, reliquerint in vulnere fila, ne coalesceret, ita aquam continuo fluxu diu noctuque effluxisse omnem;

§67. Oedematum, quæ duplicis, vel plurium causarum soboles sunt, quæ ideo §36 *Composita* vocavi, multa dantur genera. Ego cum spatii habenda sit ratio, bina tantum, quæ curatius notare mihi licuit ex ipsorum numero proponam. Primum est, quod de Symptomatico æque genio ac de Metastatico participat; alterum ex parte Febri, ex parte Infarctui viscerum abdominalium debetur.

§68. *Prius Genus* vel in principio Symptomaticum fuit, & superveniente metastasi, ex mutato morbo primario cognoscenda §49, talem demum induit constitutionem; vel quod Metastaticum erat, Compositum redditur, accedente suis ex causis ægri imbecillitate; vel denique subito quasi infertur tale, quando homines imbecilles metastasin experiuntur.

§69. De utraque causa prædisponente, Imbecillitate atque Metastasi, plura non addam. Nec occasionales causas supra expositas repetam: inter hæce tamen potissimum animadvertendam moneo nimiam a nutrimento abstinentiam a).

a) Quantopere tenuis nimisque exacta diæta, in qua multi tantam fiduciam ponunt, noceat in intermittentibus, prolixè probat van *Swieten* Comment. T. II. ad §762.

§70. Curatio sæpe obtinetur Roborantibus aromaticis, quibus unum alterumve Purgans interponitur. Tutior tamen, licet magis lenta medendi via est, qua remediis Diaphoreticis utimur, iis scilicet, quæ simul roborandi vi pollent. Hujus



census sunt, quæ præsertim regnum vegetabile magna in copia largitur, Amaricantia atque Amara. Hæc non tantum debilitatis primis viis egregie prospiciunt, sed etiam quoad principium suum gummeo-resinoso-oleosum decenter soluta, & per lactea, aliaque inhalantia vasa ad humores circulates delata, singulari stimulo fibras instigant, unde harum contractiones vividiores redduntur atque validiores, solida confortantur, humores commoventur, attenuantur, & excretio noxiorum maxime per poros cutis promovetur.

§71. Perspirationem istam cutaneam apte etiam augeamus adhibitis Externis; v. c. partem tumentem vel linteo calido sæpius fricantes, vel pulveribus ficcis farinosis, sale decrepitato, herbis aromaticis bene siccatis, cet. in forma epithematis impositis foventes.

§72. Oedemata, in quibus & *Viscera infimi ventris Infarcta* atque tumida, & febris *Intermittens* ut causæ debent respici, intumescencia atque duritie abdominis internoscuntur. Decumbens æger, situmque corporis mutaturus obscurum frequenter ponderis cujusdam sensum in ventre percipit. Alia insuper haud raro incommodant symptomata, v. c. anorexia, alvi vel constipatio, vel profluvium, aliaque pathemata consensualia. Plures autem sunt oedematis species, quæ ut intelligantur, pauca de isto *Infarctu* differere operæ pretium est.

§73. Tumores quidem illos atque duritiem abdominis veros significare Infarctus vel Obstructiones, a materia viscida, in vasculis viscerum lentius mota, cumulata ortos, sequentia suadent argumenta: Primo manus explorans viscera hepatis, lienis tumere satis clare sentit; deinde tumor talis non discutitur, nisi appropriatis remediis deobstruentibus *a*); & denique nisi matura adhibeatur medela, sæpe sæpius succrescit verus scirrhus: uti notat Ill. van SWIETEN, quod in visceribus abdominis pertinaces obstructiones nasci observatio doceat, quæ quandoque in scirrhosos tumores, vix resolvendos postea mutantur *b*).

a) Memorabilem aliquem casum, qui ad illustrationem facit, heic narrare licet. Adolescens spongiosi corporis habitus sub finem Augusti 1761 febre anomala corripiebatur. Instituta fuit, nescio quo consilio, venæsectio brachii, & medicamenta data adstringentia. Coercebantur ita motus febriles; verum pedes in regione malleolorum intumescebant, & tumor per integrum mensem usque ascendendo augefcebat. Jam in Nosocomium Argentinenſe æger recipiebatur. Tum temporis Oedema pedes fere totos occupaverat, abdomen præsertim ad hypochondrium dextrum durum erat; præter lassitudinem autem, appetitum prostratum, & levioſum æstus sensum, per noctem perceptum, vix notabilia urgebant symptomata. Exp. D. *Bæhm* præscribebat pillulas scilliticas, & postea valida hydragoga, quibus etiam stimulus gummi guttæ adjiciebatur. Sed in cassum hæc refractario malo opponebantur. Et miranda pedum amplitudo, scrotum tertia fere parte naturalem magnitudinem excedens, omnis corporis superficies tumida, aqua in cavum abdominis profusa, strictura præcordiorum, dyspnœa, tussis sicca, atque urinæ reddendæ difficultas res ægri in ancipiti versari testabantur. Prudenti tamen ex indicatione nihil aliud tentabatur, quam ut referentur obstructions. Exhibebatur itaque per octo dies infusum ex vegetabilibus *Amaris*, atque *Millepedibus* & *Sale* mirabili *Glaub.* Postea subjungebatur *Sal Ammoniacum* ad drachm. j. mane & vespertine ingestum, additis decoctis diureticis. Hujus salis usu per sex dies continuato, nec hydropis scroti & ascitis, nec duritiei abdominis supererat vestigium. Omnia symptomata evanescebant post propinatum *Purgans*, & *Confortans stomachicum*; & pedum tandem oedema vapore *Aceti* prorsus discutiebatur.

b) L. c. T. II. ad §753.

§74. Illustr. quidem van *SWIETEN* a) malum in liene hæſere negat, quia cito sæpe solvatur: potius contendit, quod Colon intestinum infarctum & tumens circa lienis regionem, ubi inflectitur illud intestinum, scirrhum lienem mentiatur. Verum si incipiens est infarctus, necdum verè stagnat materies, quid impedit, quo minus iste æque facile iterum solvatur ac in hepate, materia in motum fortioſorem acta? Deinde, si inveteratum malum, atque vera & consummata est obstructio, difficulter & crebro prorsus non amplius istam referari, quotidie observamus. Nec obstat, quod tumores isti abdominales purgantibus aliquoties repetitis interdum dissipentur b). Quæ enim ratione purgantia, quæ fibras tubi intestinalis irritando



actionem exercent, obstructiones aperire valeant, nulla premitur obscuritate.

a) l. c. ad §753.

b) ibid.

§75. Distinguendi sunt nostri *Infarctus* in *Symptomaticos* atque *Metastaticos*. Priores respectu essentiae atque tenoris febris nihil mutationis inducunt; hosce superiori hyeme Argentorati notavi plurimos. Per *Metastaticos* contra febris modo vere solvitur, modo conspicua ratione mutatur. Hi sunt, de quibus asserit SYDENHAM a), quod iisdem gradibus, quibus hoc symptoma supervenerit, febris etiam fugam meditetur.

a) l. c. pag. 60.

§76. Quo jure tumores viscerum abdominalium causis oedematum antecedentibus annumerentur §18 & 19 evictum fuit.

§77. Febris, quæ alteram compositi mali causam sistit, vel ex imbecillitate, vel ex metastasi contribuit. Utriusque dispositionis effectus, diagnosis, atque causæ satis demonstrata sunt in antecedentibus.

§78. Itaque nunc aliquæ addendæ sunt potentiae, quæ ut viscera infarciuntur, occasione esse consueverunt. Ill. van SWIETEN a) originem obstructionum hepatis repetit à sanguine venæ portarum crassiori, per diuturnas febres liquidissima parte orbato. Ita quæcunque febres reddunt diuturnas, hoc loco criminandæ sunt potentiae. Certe efficaces hæc sunt respectu mali *Symptomatici*.

a) l. c. T. II. ad §753.

§79. Intuitu mali *Metastatici* tanquam maxime noxia per observationes Practicas probantur medicamenta *Adstringentia*, atque *Aqua Frigida* tempore æstus febrilis ingurgitata. Ad *Adstringentia* etiam refero celebratum illud specificum antipyreticum, corticem Peruvianum, non quod oderim præstans pharmacum, sed quod cum judicio discretivo in usum vocandum putem. Hæc imprudenter & largiori dosi tum propinata, quando primæ viæ nondum sunt expurgatæ, & miasma viscidum per humores diffunditur, omnino vituperanda censeo. Etenim vasa contrahendo, humores magis increfando,

sando, motum progressivum impediunt, & infarctus, verasque generant obstructions, ac Naturæ obstaculum opponunt vix superandum.

§80. Haud multum dispar est ratio Potus Frigidi. Ab hoc augetur quidem fibrarum cohæsiō, sed cum calore naturali vis vitalis minuitur, & fluida spissescunt; unde similis, qui Adstringentium, effectus, & motuum Naturæ salutarium perturbatio.

§81. Periculo nunquam carent hæc œdemata. Magis quidem funesta æstimantur, si obstructions sunt symptomaticæ. De his pronunciat van SWIETEN *a)*, quod pejor longe hydrops post febres diuturnas sequatur, si scirrhosæ obstructions viscerum ipsum fecerint. Ut plurimum succedit hydrops Ascites, cui quando inveteravit, difficulter succurrit medicina: *b)*

a) l. c. ad §753.

b) Conf. Lommius loc. cit. pag. 185, & 192.

§82. Indicationes rationales formaturus, de utraque antecedente causâ legitime removenda sollicitus est. Prima quidem cura convertatur necesse est ad viscera infarcta. Visceribus enim chylopoëticis præter naturam constitutis bona & perfecta crisis neutiquam perficitur *a)*, nec persanatur febris. In symptomatico malo humorum visciditas, partiumque firmarum imbecillitas Resolventia exigunt cum Roborantibus jungenda, pro ægri conditionibus sæpe diversa. In Metastatico contra infarctu potior spes in Attenuantibus ponitur.

a) vid. Wegelin Diss. de Metastasi. pag. 7.

§83. In transitu quoque notaverim, me minime ridere practicos, qui juxta deobstruentia interna etiam commendant Unguenta Discutientia externe abdomini tumentis illinenda. Viam rationemque operationis eorum licet non ubique distincte capiam; observationibus tamen & summorum virorum præceptis *a)* fidem habere nullus dubito.

a) vid. van Swieten Comment. T. II. ad §753.



§84. Sic una cum vitio viscerum frequenter subigitur Febris. Sin restiter, suis jam Antidotis extinguenda est; Oedemata autem discutiuntur medicationibus supra probatis: alibi illa, quæ per tubum intestinalem, alibi autem, quæ per poros cutis aquam exturbat, nec posthabitis remediis Externis.

§85. Supersunt Oedemata Composita, quæ cum & febrim Intermittentem, & alios distinctos à febre Morbos causas antecedentes habeant, partem Dissertationis constituere debent. Infinito ea possibilia sunt numero, pro morborum multitudine conjunctim cum febre urgentium, & quoad essentiam ab invicem diversorum. Differunt etiam ista multis modis, quatenus febris vel per consensum, vel per metastasin ad ipsorum constitutionem confert, atque ceteri morbi, vel inferendo naturæ imbecillitatem, vel retardando refluxum venosum, vel denique vitiando humorum mixtionem. Veruntamen, cum unicum tantum eorum observaverim ipse genus, quo Febrim jungebatur *Scabies*, & modica librorum supellex hunc experientiæ practicæ defectum non suppleat, finem jam imponere consultum videtur, rivulosque claudere.

DOCTISSIMO DOMINO AVCTORI DISSERTATIONIS HVIUS

S. P. D.

P R Æ S E S.

Recipe: Tabellionem j. Testes nro vij. adde sacerdotem cum aqua & oleo benedictis, q. s. dispone domi Tuæ; & moriere; formula est, quam in libello scripsit de incertitudine, & vanitate omnium scientiarum, & artium, aphorismo de Medicina Operatrice, p. 449. edit. de anno 1714. Cornelius AGRIPPA, illud argutum

gutum non tam scientiarum, artiumque, quam earundem Magistrorum individuum flagellum, (utinam religioni pepercisset!) quod ibidem ita præludit: Medici, si paulo religiosiores fuerint, hoc extremum præscribunt pharmacum. Inveni nuper, sub significatione minus feriente Medicos, Tuam vero ad dissertationem propius pertinente, cum aliqua mutatione ita repetitam hanc formulam: Rec. Testes num. vii. Fossores cum ligonibus num. ij. Vespillones num. v. sacerdotem cum aqua & oleo benedictionis num. j. dispone domi tuæ, & moriere. Talem scilicet exscripsit Agrippæ formulam Joan. Henr. de HEVCHER in suis operibus, quorum editionem anno seculi currentis XLV. curavit HÆNEL, Tom. I. Caution. in cognoscendo, curandoque hydropne necessariarum quinta, p. 108. seq.

Ipsam cautionem his exprimit verbis: Cave, ne sis nimis tumidus, neque nimis timidus in prædicando hydropis eventu! Medioque sub flumine argumentorum, quibus posteriorem cautionis partem ipsa suffulcire nititur experientia, inter alia scribit: Sorbaitus imitandus potius, qui ad Hydropicum vocatus, cum Medici quatuor non incelebres illud C. Agrippæ præscripsissent, tamen desperare noluit, sed pulsu arteriarum tali animadverso, qui mortem nondum denunciaret, curationem magno animo, maximaque spe pleno aggressus ægrum præter omnem spem, atque expectationem omnium Medicorum, ab hisce Prognostico relictum, in pristinam restituit sanitatem. Ad vim vitæ, subjungit HEVCHERVS, Naturæve respexit Medicus sagacissimus, quæ, ubi superior morbi vi fuerit, raro solet destituere audaces; unde paulo post adjicit: Usque adeo verum est, in desperatissimis casibus non esse desperandum, cum sæpe, præter opinionem, tales in corporibus ægrotantium oriantur conversiones, quæ vel invito Medico, & omnem despondente animum, ægrum bene valere jubeant.

Nonne vero conversiones hæ, de quibus HEVCHERVS loquitur occasione pertinacissimi morbi chronici, hydropis puta, qui tantam, totiesque crucem figit Medicis, ut non inepte illorum scandalum appellare soleant, sunt ipsæ illæ Tuæ crises, quas ultra sphaeram acutam in hoc specimine Tuo extendis? quasque vis vitæ, Naturæve, vi morbi



morbi superior, in exemplis non adeo raris excitare potest, & solet in solatium aegrorum, quod spem relinquat evadendi e faucibus Erebi? sunt procul dubio! Aliud autem inde corollarium prono fluere alveo intelligo, nimirum hoc: plurimum interest, nosse illam vim vitæ, Naturæve, perspectas habere conditiones ejus omnes, aestimare illas, & comparare cum vi morbi, ejusque conditionibus, hinc eruere mensuram, quæ alterutra sit superior vis? cognita habere media, quibus morbi vis frangi, vitæ vis conservari, & instaurari, vere augeri prudenter possit? His momentis omnibus bene attentus Naturæ Minister, felicissimus erit Practicus, certe tutius illos præternavigabit asperissimos scopulos, ad quos cum feliciter sæpe acta est vitæ navis, opinione citius naufragium humana salus patitur.

Observavi mira cum voluptate, hanc Tuam dum perlegi Dissertationem, premere Te sollicite ubique Naturæ vestigia, & vigilantissimum ejus ut motuum, ita & horum directionum speculatorem in morbis esse, quare non tantum confido prorsus, reportaturum esse Te meritam ex hoc specimine Tuo eruditionis medicæ gloriam, verum & prosperrimam Tibi præsagio praxin, hoc ubi tramite perrexeris, qui per vias ducit serenissimas, practicosque pedes munit a præcipitantia lapsu, facem præferente solidissimo experientiæ prudenti timiditate collectæ cum ratione connubio. Quamobrem impense gratulor & serio Meritissimo & Clarissimo Domino Parenti Tuo de Te, filio undique optimæ spei, egregiæ hætenus actæ morum elegantia & probitate, quæ profecto meo in animo non minus valet, ac eruditio, mortua, certe periculosa sine ista, maxime in Medicinæ Candidatis.

Atque his paucis valere Te omni ex parte jubeo, iterumque valere, Tu vero me amare perge! Scripsi e museo meo D. XI. Oct.

A. R. S. MDCCLXII.

